



17. august 2020

UKA 2020/81

Inatsisartut suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara.

Motorafgiftimut suliassat, allaffissornikkut, akiliisitsisarnermullu akisussaaffik kommunenut tunniunneqarpat sutigut sumiiffinni iluaqutaasinnaanersut pillugu Inatsisartunut apeqquteqaat aallaavigalugu oqallisissiaq.

(Inatsisartunut ilaasorta, Aqqalu C. Jerimiassen, Atassut)

Qitiusumut eqiterunnerup annertusiartuinnarnera killilertariaqarparput, nunatsinnilu suliassat siammarterlugit. Kommunenu suliassatut tunniunneqarsinnaasut ilaat tassaavoq motorafgiftimut akiliisitsisarneq.

Eqiterunnermullu akiuiniartussamik siunertaqassagaanni pingaaruteqarluinnarpoq isumalimmik suliarinissaa, siammarteriniaannarlunilu siammarterisoqannginnissaa. Taamaattorlu tulluorsorinarpoq allaffissornikkut suliassat ilaat, soorlu motorafgiftimut akiliisitsiniartarnikkut suliassaq kommunenut akisussaaffimmik tunniussigaanni.

Siammasissumik suliassat agguataarnerannut iluaqutaasinnaavoq, najukkat qanigisaanni suliassat suliarineqartarnissaat. Sulisullu kommunit allaffianeereersut sumiiffinnut qaninnerusumik aamma suliaqartarnerat iluaqutaasinnaasut taaneqarsinnaavoq.

Qamutit motorillit akileraarutaat pillugit Inatsisartut inatsisissaat nr. 3, 16. juni 1987-imeersup § 1-ni allaqqavoq taakku akileraarutit nunatta karsianut tuttassasut. Massakkullu taanna akileraartarnermut aqutsisoqarfiup suliarisarpaa.

Kommunit akiliisitsisarneq isumagilerpassuk, kommunenut isertitassat aamma annertunerulissapput. Sumiiffinnimi tamani motorafgiftinik akiliisoqartarpoq, akiliutigineqartartulli sumiiffinnut ataasiakkaanut iluaqutaaneq ajorlutik.

Kommunit Namminersorlutik Oqartussaniit bloktilskuditut ilaatigut sanaartugassanut atugassiaagaluartut, kommunit namminneerlutik tullerriaarinerminni aalajangertarpaat sumut atorineqassanersut.

Assersuutigalugu Nanortalimmi biileqartut ukiumut marloriarlutik motorafgiftimik akiliuaraluarlutik aqquernit ukiorparujussuit suliarineqarnikuunngillat, itersarsuarnillu ulikkaarmat aqulluttupilussuulluni. Taamatorpiaq aamma Upernavimmi, sumiiffippassuarnilu allani.

Aningaasat kommuneni kaaviiartinneqartut amerlanerulertariaqartut, sumiiffimminni suliassat annertunerusut isumagilersinnaaniassagamikkit akissaqartinnerullugillu.

Siammasinnerusumik sumiiffinnilu atuisunut akiliisartunullu iluaqutissamik aaqqinissaq maanna Inatsisartunut oqallisissatut siunnersuutigarpur. Oqallilluarnissassinnik kissaappassi.